

肖巖詩鈔

肖巖詩鈔卷十一

涇上趙良鬻肅徵甫著

奉 命典試粵東

昔在乾隆初戊年值酉月 天子重賓興先臣出
兩浙掄材得巨眼入彀盡人傑至今六十年干支
方更迭嘉慶三載秋小臣持使節 寵命下西垣
星輶指南越兩世典文衡 君恩勒肌骨年力苦
衰頽家學慚決裂直如正牆面敢詡論文舌況乃
嶺海間珍怪燦羅列安及先臣賢擇其尤者拔然
而知人難未碍秉心潔縱使公不明終勝僞目拙

庶幾珊瑚網寬一搜滄海闊述德用自省黽勉思同
輟

曉行口占

靡及惕征程聞雞促駕行未遑宵夢穩暫喜暑氛
清密樹連雲暗殘星墮水明前途知近寺聽取曉
鐘聲

徐州渡水

荆山不見石橋橫大道翻同巨浸成隔岸遠看千
樹沒中流高與亂峯平旅人驅馬艱來往津吏牽
船費送迎誰領河堤疏築事須知 宵旰軫蒼生

徐州道上口占

大河東注繞徐州策馬初來涉亂流千古尙思蘇
玉局洪濤不敢撼黃樓

曾讀東坡放鶴文亂山如玦恍登臨此來尙記危
亭趣祇在雲龍缺處尋

宿固鎮驛用壁間梁璠峯夫子韻

茅檐當孔道門徑爲誰開傳舍何時定詩人幾輩
來洗塵依綠竹點筆藉蒼苔欲續歐公句真傷白
髮催

臨淮道中曉行

柳陰清曉散塵氛古道行人自一羣灑髯湖風寒
送雨滿襟林月淡遮雲干戈五季紛堪歎雞犬千
家近可聞此日長淮關下過真宜豐樂誦歐文

嗟虞墩

美人甘爲英雄死歌舞纔終血飛紫是時楚軍壁
垓下虞兮應葬穀陽野胡爲此地有孤墩高塋永
不埋荆榛云彼葬身此葬首至今兩地爭香魂香
魂暗與愁雲結化作春花香不滅花間點點綴殷
紅猶是當時劍頭血君不見漢宮人魂吁可矜殘
骸居厠如寢僧長安忽見赤眉入嗟嗟雉雌悲遺

陵

江北道中雜詩

層巒環抱紅心驛密樹重遮金斗城不及吾鄉山
水好祇須畧似亦關情

客心畏暑趨宵行鄉夢催回續未成最是曉星殘
月候水田香送稻風清

屢尋嘉樹暫停驂暑雨炎風劇不堪十日藍輿江
岸去祇從江北望江南

舒城道中

邑是龍舒舊山從馬上看微茫通一線曲折歷千

有巖詩鈔

卷十一

三

盤蟬響風前咽林陰日午團欲尋仙隱處梅竹與盤桓

立秋日作

憶辭絳闕夏方中匝月驅車踏軟紅最怕當頭臨午日每思洒面得秋風解鞍馬自奔泉窟歇擔人爭蔭柳叢不及閒居玩時節便從金井驗梧桐

自桐城至潛山

北道喜平行南途苦險難自從渡徐河日行山間未若桐與潛所歷尤巖岼入深墜地底憑高出林端涪翁愛山谷伯時棲龍眠茲鄉山水窟直冠

東南天勝槩未能踐足力已先殫障日舉蒲箠揮
汗沾羅紈吁嗟我僕御擔負方頽肩

夜行卽事

月黑不知處遙看天水光我行苦野涉喚渡得輕
航列炬照官騎微風吹客裳前途小池驛暫可解
塵裝

宿楓香驛

七千里路太悠長心戀松滋是故鄉從此江南行
欲盡孤燈今夜宿楓香

黃梅縣

楓香驛接黃梅縣小邑中藏萬井烟南紀國會爲
楚屬西山花早自隋傳騷人自領三湘意過客誰
參五祖禪他日塵緣如擺脫重來峯頂看生蓮

九江府

作客曾從此地經江流浩蕩快揚舲已拚老去無
遊跡何意重來是使星湓浦濤翻秋月白匡廬峯
出曉雲青蹴蹴自爲王程迫探勝何由得暫停征
旱

下田圻龜兆高田飛埃塵十田九田旱苗枯無餘
津此邦臨大江九派環城闔漑田豈無水開渠苦

乏人古來著循績如孫叔西門莫不興水利相地
以澤民旱澇固時有潞洩令之均孰有力終畝而
無屯如雲以此願作吏濟物非虛論胡爲慕文翰
競詡侍從臣

德安縣

驅馬歷陵去沿溪山路長危亭依石壁旅客避秋
陽雨苦三旬斷田憂二頃荒如何雲蔭合祇作晚
來涼

建昌夜渡

一溪縈帶建昌縣兩炬夾隨星使船差勝江州謫

司馬教人喚渡夕陽邊

望雲居山

溪山向晚倦雲還馬上蒼茫失翠鬟忽被曉風吹
得起未知居處是何山

宿安義文山書院

昔者子朱子一麾守南康大賢所過化澤與山水
長後人慕流風俎豆升馨香于此闢講院棟宇天
中翔我來增歎息無由炙儀光緬懷鹿洞初立教
何諄詳微言探闢奧遺書收散亡胡爲百年後學
舍殊蒼涼官吏假信宿弦誦無息藏我願告賢令

爲政誠有方文翁立學校班史傳循良慎無視不
急草蔓兼烟荒

過奉新有感

吾家有大令爲政法前賢此地九年佳循聲萬口
傳光風汎蘭畹靈雨遍桑田石室宜崇祀如何獨
舍旃先伯父環石公令奉新九載多善政與邑人
士講學論文刻其文之佳者名滋晚錄由是
得民有謗于道者謂奉新邑宰耳有禱必應豈
大吏反不能然誠與不誠故也大吏聞之怒急
檄先伯父到省祈雨將以罪之是夕竟得甘霖
後伯父歸且歿邑紳士請祀名宦
時爲大吏者以無奇節黜不從

奉新道中

纔出新吳郭盤紆山路深
燃松穿隧道立馬倚危岑
人子登高慮征夫靡及心
萬端愁併集衰病況相侵

宿高安東軒

蘇家老同叔監稅謫筠州
爲考東軒記應從此地留
五年棲鳳處萬古碧梧秋
勝槩今猶在安能十日遊

清江客館喜雨

雞鳴出建城月黑明星稀
卓午行中途細雨沾征衣
此邦正苦旱良田如坵龜
欲借李靖瓶一洗趙

宣威向晚達章山旅館駐驂驂忽逢雷雨作颯然
簷澗飛老屋苦敝漏中夜牀屢移想見隴畝間青
青發華滋吏民各欣喜勝如雨珠璣我行雖暫阻
信宿亦心怡

新淦道中

解鞍問渡立津頭遙憶徽公此地遊不識高蹤何
處是逢人先問近江樓

肩輿一路看烟鬟風雨都忘跋涉艱每惜匡廬中
夜過故應飽看小廬山

峽江縣

叢山枕碧流邑在萬山頭雉堞凌雲出人烟抱麓
稠危灘鳴苦竹古蹟訪巴邱我欲畱三宿時光迫
早秋

田家

綠疇盡處翠巒環繞麓人家屋數間秋樹猶濃遮
望眼曉烟欲斷見柴關雞豚應結泥田社仙隱休
誇玉笥山我亦江鄉耕鑿者遠遊何事不思還

峽江道中夜行

兩山相對出一水從中流半夜渡峽江浪靜風正
柔舍舟復登陸力窮借竹兜層巒勢遠且卧波影

倒浮微徑鑿頑石久雨飛靈湫是時月苦黑列炬
瑯燭幽墜險那可測舉足難輕投吁嗟此行路常
抱垂堂憂

吉水道中

曲折水流成吉字墨潭遙對塔亭亭

墨潭亭與白塔對此

間科第前朝盛莫道山川總不靈

廬陵縣

放棹盧江渡碧灣危亭神嶺又登攀欣看近市多
書舍何處高原訪祖關一代鴻名歸永叔兩儀正
氣萃文山到來別有盟心處只在文章忠義間

苦熱

夜出石陽院明月斜映青原臺曉過鳳凰墟旭日
正照駝峯開及其朝飯後赤雲團成堆岡巒苦稠
疊僕馬俱摧顛揮將汗雨浹肩背如臨湯火遭爍
爍豐塘橋上偶一駐好風水面徐徐來不辨風雌
雄但覺披襟當之誠快哉行人欲向林下卧所苦
前路方紆回安得長房縮地術咫尺能收埏與埴
引領西昌邑望之難卽如蓬萊一步未到豈能已
流金爍石行猶催

泰和道中

肩輿駐東嶺廓然心眼寬西昌千室邑安能逃所
觀城堞遞隱見竹樹圍團欒祇有雙白塔湧出長
林顛仰高易爲見燭幽誠獨難我欲登快閣晚晴
倚長天勝槩俱在目一攬收萬端遺構渺何許空
吟山谷篇

萬安縣

山意作輕寒秋陰接萬安客循危磴上衣染溼雲
搏疊嶂排花跗凹峯聳馬鞍從來多秀麗試駐竹
輿看

萬安道中

夜過楊梅汎溪山望不分路盤蛇曲曲人萃蟻羣

羣山氣滴成雨溪流蒸作雲芙蓉立何處待看嶺

頭文

周子云芙蓉山何減文章嶺耶

分水埧塘

日光當卓午人力正窮時復見一峯陡平分二水

披風高吹颿灑徑絕陟屺屨蜀道青天上應同此

險巖

宿攸鎮驛

攸鎮西江驛清宵作客來思鄉心抑鬱對月影低

徊節以經秋感

時七月十五日

筵當饋食開故園今夕酒

應悉旅人哀

佛子埧塘

太古應無路丹崖峻極天誰爲開鳥道始覺有人
烟邱壑穿千曲松杉合兩邊埧塘稱佛子高處想
栖禪

贛縣

馳坑跨谷馬摧頽直到虔州地勢開繞郭虹流章
貢水掃天翠湧鬱孤臺徒憐望闕層雲隔安得尋
奇十日來欲訪坡公吟詠處崆峒斜照隱崔嵬

道中書所見

秋來早稻盡登場晚稻花凝露氣香且喜一年成
兩熟居人應不少倉箱

竹輪徑丈輻居中每輻斜懸汲水筒便借波流相
激發奪天千倍桔槔工

大婦爲耘少婦籽終朝赤脚不知疲猶循古禮出
蒙面簞笠簷邊青布垂

過梅嶺

層巒高拂天飛鳥忽在下自非歷焚刊焉能渡車
馬古來人力通不待神斧假磴接繞中峯石開構
蘭若中有文獻祠棟宇煥丹赭我來奉使節誰與

共閒寫折梅春事空寄書雁來寡回首望長安密
雲覆平野

謁張文獻祠

九鼎全憑隻手扛豈惟風度世無雙生前徒事呈
金鑑亂後方知祀曲江餘力焚刊通庾嶺中原聲
教暨蠻邦千秋百粵梯航路宜有芳祠薦楚茳

保昌縣登舟

市烟台沓擁山樓叱馭南來第一州回望梅關辭
驛騎便從湏水買輕舟折花欲寄遲來雁破浪難
馴羨沒鷗遙憶羊城千里隔片帆風送莫淹留

舟中望韶石

我從大庾嶺頭來，歷盡江山崔嵬。買舟凌昌下，
瀘武二水交流，韶郡隈獨倚危。情望高岸千巖萬，
壑是奇瑰或深而銳，若戈戟或窪而深如尊。疊巖
若賓主相拱揖，親如骨肉相傍俛。各開面目費鏤
刻，欲立名字還疑猜。聊憑舟人作指點，就中韶石
尤佳哉。危亭相望臨水出，曲江有兩崖對峙摩天。
開崖根水面，石林立笙鏞。磬管紛成堆，我聞嘉樂
不野合。荆公詩句殊堪吟，荆公詩云昔人舜葬蒼
梧。語本誕，南巡祇到衡陽回。細思天地巧生物，曲

肖萬態如陶坯石鐘土鼓本形似川鳴谷響爭喧
應昔人借喻九成奏好事遂築聞韶臺曲江有亦
聞韶臺
似軒轅張雅樂洞庭風浪聲如雷

觀音巖

崇巖壁立入層雲無路容穿虎豹羣幽洞忽開成
古剎危梯幾折壓江濱險憑寶筏慈能渡空擬禪
心靜不紛我欲焚香參妙諦聞思大士定先聞

晚泊英德縣

帆影落滄涯孤城一水長飛滿轟東挾峭壁立濱
陽猿狖空騰踴魚龍久遁藏前山多雨氣向晚送

秋涼

瀘陽峽

誰能神巧如化工補綴碎石成危峯立者上指下
者墜壘者倚者橫復縱此山得一已奇突況復對
聳摩蒼穹爭新圖異費陶鑄亦似人面無雷同想
當混沌本一體巨靈劈作雙芙蓉江流到此忽束
縛水石戰鬪喧雷風我聞巴峽天下險峩峩雪浪
飛淙淙未能裹糧遠遊蜀遊粵亦洗芥蒂胷江山
靈蹟少所見惜其僻處滄海東瀘陽倘許三日住
拍肩定與飛仙逢

峽山寺

滇武南流急浪屯天公特與劈雲根
兩山中擁飛來寺千派都歸不二門
仙隱爭傳軒帝子詩人漫詠劍翁孫
但憐泉石能娛客志怪從誰抵掌論

望清遠縣

輕帆纔向渡頭落暮雨忽橫江
上來一片孤城雲裡沒遙從燈火認樓臺

喜雨

南荒苦炎熱入秋猶盛夏
居處假見舟逼仄遙蝸舍
浪滾波沸湯炎炎日高射
趺坐譬如燔伏枕夢

風櫺昨宵泊峽山微雲生石罅朝來急雨飛快似
瓶盆瀉葛衫覺輕軟蒲扇頓休暇寢食各安便童
僕相慰藉聖朝普盛德百神贊元化豈能容旱
魃肆虐及躬稼流潤灌醅酬懷新翻秬稌小臣竣
事歸欣看通八蜡

呈吳鑒菴太史用東坡舟行至清遠縣詩韻
玉署飛聲慚隔壤畫船銜尾喜登仙粵江浪聽風
帆湧山寺燈看雨夜燃修月吳剛知有斧囊書趙
壹分無錢南來却憶潮陽守獨爲文瀾障百川

三水縣

一派胥江水分將三處流有時同赴海此地各浮
舟鼎鼎百年內勞勞萬里遊鏡臺容暫泊未免觸
離憂

三水舟中

何愁瘴雨與蠻烟佳日斜臨使者船樹影欲迷珠
海外秋光不到鏡臺前七千餘里路垂盡九十二
人心共懸廣東解額七十二名是歲恩例廣二十名爲報羊城諸吉
士辛勤敢負舊寒氊

廣州使館作

何物能方大雅才番禺八桂嶺頭梅炎州靈產逢

人問 聖主鴻恩許我來花氣曉迷劉氏塢潮聲
夜上趙王臺欲從越秀尋遺蹟深鎖重門不敢開
呈諸同考官用東坡監試呈諸試官詩韻

猿鹿不服轅雀鼠徒盜廩素餐非夙心短才困天
稟承 恩入中禁橐筆歷三稔 寵命忽朝頒清
冰乃夕飲內熱愧生驚背浹汗流漉百粵副星輶
諸生分月品竊恐混鼎瓠有似昏葵荏心鏡澁不
明黎邱辨難審諸君實才傑名藉東南甚出宰試
烹鮮績學優製錦求珠剖蚌胎披金汰沙礫漆室
有明光康莊無蹕蹕況復老中丞

謂監臨陳簡齋中丞鐵柱

風霜凜門增鎖鑰嚴海戍魚鮪淦招鳳高岡梧變
鴟泮林甚祝融益發英多士遂聯袂持節得韓范
屬吏盡文朕操鑒各矢公得人將入諗先資效虞
奏游談黜伊任要使代鄒魯豈屑剽任沈報國
藉文章搜羅忍飢寢立法本平中式俗付雕鏤去
取一朝分觀聽羣喙噤毋令白黑淆後悔徒撫枕
搗曉後作

魚鑰沉沉鎖棘園今宵快得敵宋扉敢云滄海珠
無淚自信冰壺玉有輝盡日白袍多鶴立搏風碧
落幾鵬飛諸君於我何恩怨聽取公評是與非

花地

榕樹陰中牡蠣墻江邊一帶種花莊入門未辨芝
蘭色卷幔真連几楊香抱甕丈人工射利踏春遊
騎慣飛觴我來暫借庭前坐鼻觀禪參意味長

遊光孝寺觀六祖像

近市苦囂塵入寺喜芳潔白晝無人聲虛堂惟象
設解衣步長廊面壁讀殘偈華構始齊梁五祖畱
衣鉢學與神秀同派自南宗別至今供香龕鑄銅
肖瘦骨僧言韶石間南華開寶刹我祖終涅槃法
身未泯沒顧聞祖偈云本來無一物六根固妄存

四大亦虛列焉肯戀皮囊不使歸解脫我願告僧
徒一炬付灰滅

觀貫休畫羅漢二幅

我昔嘗讀竹垞先生詩貫休手寫羅漢恍見之一
僧執筆若有思旁立狙公拱而窺一僧說經一僧
聽說者白皙聽者顏何鰲溪山亭榭紛點綴一一
摹寫筆下工無遺我今遠遊珠海湄訶子林邊短
策支入門升堂窺丈室兩幅雲母屏前垂細觀畫
中人竟與朱作無參差却怪貫公盛名下應有高
情逸氣揮淋漓不宣沾沾取形似周規折矩如畫

師況當五季迄今日閱歷寒暑垂千林如何絹紙
有新色却似研丹吮粉初寫時得非後人所偽作
何以竹垞妙鑒爲所欺先生自以詩當畫詩妍心
已忘畫蚩

菩提樹

菩提樹出摩伽陀經冬枝葉垂猗那我佛成道發
靈蹟此樹應瑞蟠根柯何年攜植南海寺一枝踰
越千關河想當六祖初卓錫古寺僧衆來奔波應
從樹下袒跣坐亦如我佛棲杪羅樹有靈性永不
滅六朝迄今歷年多僧言舊歲海風惡橫空勢挾

雷雨作捲將茅屋逐飛蓬
拉折喬林如掃鐮可憐
寺外舊青葱一宵變化隨
飛龍清陰已無十似櫟
餘枝徒作半生桐我來倚
樹增歎息靈光黯然猶
可識摩訶老幹有清香回
顧庭榕失顏色寺僧贈
我秋葉枯白如繭紙堪作
書不寫新詩寫禪偈本
來無樹將何如

遊洋市觀偶人作書畫

聖化廣招徠梯航通萬國
粵民襍島夷珠海走番
舶漸開交市場貨物日充
積象犀備器用鍾表按
漏刻中有木偶人神采何
奕奕形骸儼生成衣冠

備華飾右腕握兔毫旁人漬濃墨展紙于其前相
對徒自默中空機暗藏線引形爲役錚錚聽腹鳴
歷歷看指畫周折無不能變化惟所適須臾書畫
畢手停聲亦寂畫具人物形書成楷隸式衆人駭
一觀兩幅粘半壁默思番技奇幾與偃師敵豈知
古王貴器不作無益遠方自充貢 聖主獨麾斥
曩以偶人作 貢却勿納 遂令滯廣州數載鮮交易維風戒志
潘萬古欽 盛德

遊觀音山

晝戟朱門日往還困人酒食未開顏暫偷客裏清

閒福來看天邊越秀山拔地一峯高突兀躡雲千
磴勇躋攀平生祇有登臨興到處心棲水石間

節過重陽雨乍停越王臺畔敞軒櫺一條南海掀
天白數點西樵落日青極目風烟收嶺嶠傷心歌
舞剩山亭百端每向登高集懷古情多酒不醒

趙佗劉龔豈能賢花塢歌臺各逞妍空與後人爭
眺聽可憐終古此山川天邊螺髻諸番島樹裡魚

鱗萬瓦烟

聖代民夷無內外柔懷都遣拱幽燕

相從匝月細論文

時同遊者爲監試丁藍溪考官汪容川丁雲濤三君皆余同年

此日尋山暫息勤幾處秋花容對酒一行征雁又

離羣下方燈火知人靜高樹星河惜夜分世外香
臺難久戀歸途車馬自紛紛

歸舟宿花地

來從花地宿清陰最娛人去從花地宿秋雨獨傷
神花地望越秀十里通烟津來時敬所事去時戀
所親所親有官吏許我頗知文一樹非百獲何以
酬君恩

舟中望峽山寺

峽山寺名傳粵東南北取此來往通我前經過值
雨夜數點佛火騰熊熊茲來正逢清曉候一峯拱

揖趨烟蓬峯回路轉見樓閣
巖壑巉巖額懸當中背
枕崇巖作屏帳前臨綠水開簾櫳
蜂房丈室不可見但覺依山跨澗一
循天工昔讀蘇詩愛清境
松門雲碓夢寐逢幸承
寵命來試士攝衣準擬
登危峯奈何風利不得泊咫尺難到蓬萊宮
公家程限本寬假征夫靡及行匆匆
高咏空山琴筑句耳邊彷彿聞琤淙
娛人泉石惟意會輸與謫宦遊
從容

久雨

漏天何日得開顏
一葉濛濛細雨間
編竹有蓬愁

不蔽糊窓無紙笑徒關惟宜抱膝搖孤榻未許伸
頭看好山多少船前牽百丈憐他赤腳踏潺湲

舟行南韶間作

南韶山好甲天下庾嶺以來似奔馬中途作勢紫
韁迴飛彩成文香汗赭峻嶒瘦態想僧趺窈窕輕
鬟遇嬌妮高插一峯仙掌擎低垂千股花枝哆備
擬形容尙掛遺真知造物工陶冶兩郡山奇水亦
奇清快流從珠海瀉實多靈氣鍾扶輿應產才人
擅大雅唐有文獻張九齡宋文襄靖後人誰爲繼起
者方今 文教實覃敷濡化被風變夷夏試士親

從五嶺行此地竟無一名假古來功德不朽難場
屋科名亦何寡可歎江山不助人莫怪冬烘消取
舍

保昌行館阻雨

莓礎苔階滴未乾
凌昌驛館阻征鞍
虛堂晝靜蒸烟溼
破絮宵深潑水寒
漲湏江通竈下雲飛庾
嶺落檐端且求雨具
搜箱篋去去休辭行路難

雨中過大庾嶺

雨行不敢笑臧孫
久雨何能待曉暾
任有危峰摩碧落
且憑赤足踏雲根
烟中樹色浮天暗
谷口泉

聲捲石奔自別羊城剛半月而今纔出粵東門

絕句

石磴雲關一徑縈夜中經過未分明秋風細雨歸
時路天遣幽人緩緩行

大庾舟中

大庾叢山勢鬱盤建瓴千丈渴驚湍浮舟恰遇秋
冬雨過客都忘十八灘石齒波平收快劍江心風
利送層巒昨朝別却崎城去勝景虔州咫尺看

次韻蔡生甫太史贈詩

平生有癖苦吟頻一字師逢粵海濱惜我曾無長

笛句慚君虛作賞音人多情詩勝傾囊贈衙尾舟
如比戶鄰爲副使星高第弟謂吳鑑菴太史論交纔得可
宗因

由贛縣至萬安

未須蠟屐踏烟鬟卧看西江兩岸山盡日舟行林
翠下有時斗轉石稜灣灘流穩勝埤塘險風力強
于驛騎孱到得萬安平似掌耳邊無復水潺潺

次韻蔡生甫舟發大庾途中作

連旬積雨送輕艫粵海行來又楚江旗脚捲回風
片片石鱗減却水淙淙頻招碧玉千重嶂穩啟紅

油兩面窓豈及山陰勞應接新詩終是念鄉邦

生甫

浙人詩云未必家
山勝此邦故云

過惶恐灘

去國孤臣戀端拱黃公灘畔泣惶恐遂令千古共
承訛過此心驚兼貌悚灘師意貪聲價昂客子錢
輕性命重悲號水石戰雷風跼踖蓬艫如械萃我
今試士到羊城豈比謫官望鄉黨執版江邊津吏
迎刺船沙路驛夫擁況值懷柔聖德隆幸承庇
蔭神靈寵自從南嶺雨廉纖新漲西江流傾洞輕
舟有水任開頭怪石無鋒得鑽空遙思玉局獨行

吟可歎衰朝多傷憊

次韻蔡生甫舟行苦雨

戚戚復戚戚兀坐長太息斜風正注面急雨復沾
席密排板戶遮宵如漆室黑墮雲漏殘日破壁透
微白一線乍光明千絲隨點滴浹旬氣鬱蒸腹疾
卧轉側歎爾狂飈來一解濃陰塞送晴心所欣覆
舟心所惻遙見隣舟人驚怖如鬼色

途中見水車賦之

昔者坡翁賦水車形容妙借蛇與鴉此車迥與桔
槔異銜尾脫骨奚足誇掾竹爲輪大徑丈兩輪一

體毫無差貫以短竹三十幅束縛使固絲麻比
擬紡車畧形似大小奚啻十倍加汲水有筒半幅
數與輻並設微竅斜植木爲柱橫置轂下承以筧
臨江涯江邊聚石作隄埽外高務使中低窪通令
洪流向中注建瓴直下無回袞自筒入筧筧通畝
水勢激發誰能遮人力不勞收自倍天車肇錫名
維嘉土人各曰天車以我本江鄉老田父滿場碌
碡非不除每逢歲旱煩水戽勞筋苦骨吁堪嗟他
日言歸訂農譜定將此法傳千家

肖巖詩鈔卷十二

涇上趙良霽肅徵甫著

舟過峽江縣

我前過峽江昏夜緣絕岸上登足忤疲俯覽頭腦
眩至今一追憶色似談虎變何如駕輕舟兩槳飛
穩便中流發歌嘯左右牽顧盼林豁聳孤城雲飛
露危棧羊腸有千曲蟻路纔一線近尋苦險巖遠
觀快清玩好景不可留江漲駛如箭

喜晴

雨氣連江暗彌旬鬱不開忽逢晴日出如見故人

來樹老飛霞片波平散雪堆舟師欣挾纈柔櫓自
爲催

過豐城天陰欲雨

纔快時晴好還愁宿雨侵岸楓含雪色征雁引歸
心江到富城關雲連彭渚陰磯頭誇第一客路懶
追尋

奉酬蔡大生甫南昌贈別之作卽次前韻

困眠蓬底雨風頻每喜詩投寂寞濱楚相城中歡
讌侶滕王閣下別離人牽情世網從分袂知己天
涯若比隣贈我仁言通內典半生纔得破迷因

登滕王閣

豈藉神風送畫轡附名王後興難降落帆徑自登
高閣倚檻全能攬大江秋水拍天仍繞廊賓筵載
酒孰盈缸感人最是憐才意千古閣公竟少雙

不負平生探勝心章江樓閣直登臨當時詩已傷
星物況我遊偏隔古今南浦風雲無改色西山鷺
鶴有遺音漫從 聖代求仙隱石洞桑麻閉窈深
自螺墩放舟至沙井行館作

暝色上螺墩蒼烟擁高樹酒闌罷歡燕月出逐行
屢傍岸一舟橫擘汰雙槳赴邇道故稽遊遠目屢

牽顧閣通洞江城天低鎖寒霧中流蕩空明曲渚
力沿沂微聞雞犬聲遠在燈火處板屋隱林隈筍
輿踏沙路入門解客裳放脚埋敝絮江山澹塵境
夢寐恍佳趣

掬泉亭

甘泉不在多一掬勝千澗不知源自來汨汨無夜
且下臨清溪流上有危石棧伊誰鑿磴道築亭立
其畔想當長夏時赤雲罩霄漢病暍暑侵人蘊隆
塵滿面恰遇當衢尊頓解欲清爨歷陵途旣衝行
道日無算杯飲人爭趨滿腹各盈願何殊七寶池

能澤大千徧慎莫薄涓流測之無畔岸

望廬山

肩輿過歷陵匡君廬可見睇遠總成峰步近忽開
面峰峰具起伏面面生轉變飛光欲越疆餘勢猶
插漢蹟蘊靈異藏氣發雲霞絢惜哉道左逢祇從
背後看明星曉盡沒旭日久難現何當蠟屐來一
踏巖壑遍

自通遠驛至德化

通遠驛前路出門都是山羊腸穿壑谷劍脊步屨
顛嶂迥浮天疊江遙抱郭彎漸看人境近纔覺意

安閒

五祖山

野徑荒田接翠微夕陽西下一僧歸欲尋大滿今
何在古寺前頭黃葉飛

中路菴

東粵去北燕里千計者七所經州邑多黃梅亦其
一道從此地分數恰兩頭匹遂建中路菴命名紀
其實豈有尋尺量居然章亥術我昨適經此喜極
還自失往途已半過來軌正初出屈指計長安尙
待三旬日在道慎險巇撫心增悚怵人生刻刻難

中道莫求逸

楓香驛

我前去向楓香宿繞屋扶疎千樹綠我今來宿楓
香中滿庭璀璨燦千葉紅一年三百六十日百二十
日日乘駟黍華雨雪記往來中間偃息能幾回勞
勞我生蟻磨驚不知馬蹄何日住卽看楓林無故
容昨猶少小今成翁縱使酒紅時上臉變衰未得
耐霜風

桐城道中曉行

縱陽前漢邑石徑曉登攀人影猶在地天光先見

山伯時不復作巖壑有餘閒欲問龍眠勝蒼茫翠
靄間

宿大關客館見館中菊花有作

殘柳斜陽噪晚鴉停輿借宿野人家入門氣味如
蘭友照眼分明見菊花陶令不歸秋冷落范村有
譜艷交加慚余碌碌風塵面來對瓷盆數朶斜

宿桃鎮兒子如圭來見

我家江之南我行江以北帶水隔盈盈旅思牽脉
脉小兒計我行定由此途歷偵候將袂旬邂逅獲
終夕問伊何事來卒歲艱衣食解橐出餅金題封

自天錫歸以備事畜餘則周友戚要使小人儕
各沐天子德得飽且讀書不文奚報國諄諄
夜未休雞鳴各分適

遣兒子如圭去後作

三年不共田園裡一夕纔逢逆旅間畧似家庭相
聚語終教南北各分還人生累重妻兼子客路愁
多水與山盼到江鄉歸未得空吟樂府大刀環

余忠宣公祠

皖公雲接汝陰長魂魄猶應眷故鄉歿有馨香祀
巡遠生無時命抗徐常千秋鶴化浮槎嶺落日鵲

啼清水塘酒掃不煩危學士履聲那許到祠堂

包孝肅公祠

金斗城邊孝肅祠小橋流水接苔墀遺田不賣留
崇祀環澤無租表慕思入世何須開口笑居官祇
仗用心慈莫將包老閭羅比關節無靈是我師

定遠曉行

旅宿寒難戀陰陵去不停宵迷吾豈慮道坦昔曾
經地氣蒸雲白天光入水青客心爭向暖愛日上
林坳

鳳陽道中

高皇故里起人思
佐命諸臣半在茲
一代山川移版籍
幾家衡宇對茅茨
公侯將相原無種
龍虎風雲偶有時
久矣鍾陵收王氣
荒村烏鵲噪枯枝

臨淮浮橋

淮居四瀆一視江
如同寮導之會泗沂
未得通北條自河徙
從東與淮流始交濠
州指清江計里相去遙
臨淮隄永固支祁跡
常韜我來一葦杭其廣
不容刀邇聞河決豫
乃在睢之郊橫溢及壽
亳居民共驚逃淮適
承其下受河來滔滔數
旬斷行旅不敢飛輕
橈仲冬勢初落兩岸平
無濤車徒思利

涉水面排巨艘羣鯨駢其首鐵索貫其腰船間容
有丈版接填成橋肩輿得穩步長風難動搖自此
達彼岸紀候將崇朝回憶始來時廣狹何其遼乃
知川谷內河伯固最驕胼胝非有禹咨警常在堯
每歲務防汛去歲仍決曹疏築未能畢泛濫還相
遭誰任河堤使毋遺 宵旰勞

洗馬橋

靈壁

欲渡未須舟長橋跨碧流曉寒誰洗馬曲渚但眠
鷗虹謁山前落人嬉鏡裡遊此鄉多磐石不似泗
濱浮

花庄

兩至花庄汎何曾見一花日光不暖樹風力但飛
沙土廣荒難種名訛錫轉嘉上人云本名荒錯疑
園圃勝或出故侯家

宿州

符離敗後意淒迷兩字中興不復題南渡自茲和
議定教人無奈怨梁溪

過荆山橋

徐州

荆山橋從山下起百數十丈長迤邐欄杆柱礎周
兩旁中間道闊容方軌不惜成梁費帑金祇爲

皇心憫行李橋頭紀績樹石坊題字分明承勅

旨

橋頭有石坊題曰勅建荆山橋

我從夏月來涉川洪濤驚起高

拍天望洋不得見橋道亘如長鯨波底眠池魚殃

受城門累華表禍自斑狸延彭城適當曹汎下河

伯怒遂從曹遷秋來河復決襄邑壽春臨淮總波

及下流既洩上流虛石橋如虹向空立桑土麥田

服舊耕泥牆茅屋從新葺前時魚鱉抱深憂此日

室家慶生集近聞曹隄功告成翁河不復潰防傾

我皇盛德懷百神山川奠定從清寧此橋永利

車徒行急宜脩葺橋前亭

橋前有荆山茶亭爲水所壞急宜修葺以惠行

道

與朱錫三別後途中作

坡公夜向黃樓立王子船從泗水回此樂每思朋
輩共相逢苦恨別筵催修途我敢稽行跡冷署君
偏著吏才

錫三釋褐後任徐州教授予兩過徐握
州纔得一敘因率大府檄匆遽而別

手欲言難盡意惟期後會在燕臺

謁滕文公廟

滕文仁孝資性善又何疑能奉大賢教應爲王者
師井疆殊古昔俎豆到今茲試問七雄後何人會
建祠

過鄒縣贈五經博士孟國模

馬足踏恒沙，邾城一道斜。
林枯天闕遠，山瘦日清華。
野火秦皇碣，高門亞聖家。
盤飧逢地主，暫此駐征車。

博士延客書齋爲治食具

過東平州

自昔屢偕計，此間曾熟遊。
人非魯文學，地是古須勾。
遠岫明蠶尾，殘碑識狀頭。
途中有梁顓父子狀元碑我來懷舊跡，寒日下林邱。

陳思王墓

子建遺墳腐草堆，山邱華屋劇堪哀。
洛神賦祖離

騷意齊瑟行傳樂府才信有名教餘子服竟無術
免乃兄猜可憐一代唐虞際祇是君王心暗摧

項王墓

烏江江岸楚祠存此地何緣啟墓門應爲魯公隆
葬禮便從東國與招魂臺高戲馬歸無路墩號嗟
虞別有村千古英雄原共盡長陵寧比穀城尊

銅仁驛值雨

肩輿出東道日苦黃塵迷忽遇廉纖雨都成滑汰
泥溼雲彌壟畝荒驛滯輪蹄猶幸穀城過已無山
待躋

高唐州

林影遠蒼蒼孤城帶夕陽車書通北道井里憶東方
神女夢何有綿駒歌未嘗輿圖資考証不是此
高唐

德州浮橋

鐵索貫長堤浮舟落彩霓二東連海岱一水界燕
齊地喜瞻天近心憂計日稽凌州催曉發遮莫
五更雞

道中積雪

地脉能令天氣別齊東晴日燕南雪雪在我行未

到時到來見雪纔能知但見坡壟聯翩間平陸一
片寒光眩遊目飛花不散綴枯林擁絮成團壓茅
屋我行雪地車班班馬蹄蹴踏層冰堅黑貂不禦
朔風勁凍徹皮肉皴成癢回憶凌州日停午照人
冬暖如春煦不遇長途積雪深何由知道無衣苦

抵京復命

征衫未解解征鞍五夜趨朝待漏殘祇爲 皇心
佇佳士特開 內殿對微官人行苑雪占年瑞衣
惹爐烟散曉寒咫尺親承 天語問銜 恩獨愧
得才難

移寓潘家河沿

破屋三間小似蝸但能容膝願無奢卜鄰人喜鄉

音習

謂翟立齋侍御

攬勝亭尋草廛斜

地近陶然亭

半野半

朝中隱士一觴一詠老生涯客居幸少妻孥累家
具移來不滿車

高宗純皇帝挽詞

海宇翹瞻慶九旬忽驚殂落痛堯民賓天忍聽宣

哀詔元旦曾從拜紫宸雨泣連雲悲率土烏

號攀月墮微臣千秋萬歲原同盡不沒人心獨

聖仁

握鏡承乾六十春八徵耄念倍精神華封祝信兼
諸福軒鼎丹成失聖人治洽百年興禮樂恩周
萬國識君臣唐虞內禪經三載欣戴重光日月新

春雪

屋角濃雲展帷幕長空慘澹連荒漠薄寒中人氣
蕭索如席雪片簷前落燕地迎春春不來春正月
盡無花開天公亦似厭岑寂豆稭揚得風前灰巧
綴危林作蓓蕾細黏枯草抽根夢千紅萬紫猶香
香粉粧玉琢爭皚皚吁嗟滕六汝何力能令萬物
生顏色但工作態助羣陰偏假稱祥見三白杲杲

紅日當天中
冰山百丈傾
長風欲留頃
刻知無從
此時祇有江梅好
自著花非剪水工

得汪梅溪計開

一別無端判死生
書來頻使旅魂驚
論交常憶花潭水
感舊如聞玉笛聲
愧我報施難稱量
恨君恩怨太分明
任教入世增多口
不是知心莫與爭

哭族兄庭瑞

悉數同遊老弟昆
故園今有幾人存
堪嗟鬼錄偏多友
誰遣巫咸與反魂
藉甚文章驚鸞鵲
杳無風水展鵬鷖
恨余縻祿圖歸晚
不及聯牀徹曉昏

賣花

兒童語笑聲何喧賣花人到門巷前不向花中辨
名目紅紫雜糅堆雙肩造物惜花如惜玉日暄雨
潤成娟妍欲令羣芳及時發共將錦繡裝坤乾豈
與抱甕人射利暮遊園圃朝市廛不惜摧花殺風
景得錢能救飢腸煎我衰久已成老醜一枝不復
簪華顛笑他年少逐春色紛如蟻子爭腥羶

夏日從友人借書

槐陰轉午送輕颺北牖羲皇夢醒時磊落襟懷誰
與語風流儒雅古爲師知君架有書千卷愧我家

無酒一甌借得遺編消永日勝如對客坐談棋

納涼

夕陽西下映簾櫳卧展桃笙小院中鼻觀有禪叅
得未隔牆吹過棗花飛

題楊翁世藩孝義錄後

人生百行莫如孝爲仁第一坎先導次及仁民次
愛物孝能錫類有明效關西楊公馳義聲慷慨好
善周死生豈知善行垂種種祇緣孝友常烝烝父
生母鞠備勞悴母呼父疾通夢寐翁隨父服買母
在家偶呼其名
翁心動而歸及父疾翁五晝夜馳千里得侍湯藥視含殮一片肫誠孺慕心千

絲哀痛蓼莪淚 聖朝孝治超漢唐生封死祀蒙
旌揚旌揚不是孝子意用維薄俗敦綱常

遣興

追涼選勝興難乘矮屋三間苦鬱蒸居少此君誰
免俗賦成二子最生憎瓦甌倒卧斷沽酒銅盃輕
敲來賣冰我已安心無內熱閉門兀似坐禪僧

蟬

老槐疎柳蔭苔墀任放鳴蟬寄一枝祇道先生貪
午睡情人紛噪夕陽時

六姪雷生揀發貴陽令詩以送之

大造浩無私一氣陶品彙 盛朝秉至公一體均

臣隸小大內外間 帝心同簡畀董子對策云守

令民師帥令較守尤親民命實攸寄飲食教誨之

一一煩措置誰謂百里邑最爾難展驥尙恐才識

疎未副民社司束髮讀詩書銘心豈科第所學期

不負于物求有濟幸汝今壯年筮仕古黔地莫嫌

黔土瘠民貧導以利莫嫌黔俗頑民愚示以義黔

民雜有苗彼亦赤子類向來苗不靖實由官所致

侵漁盡脂膏敲朴強驅使遂令頑蠢心勃發如蝮

鷺 廟堂費迎籌邊微馳羽騎妖氛幸掃除民氣

慮凋敝 皇恩緩征輸吏職勞撫字慎母苛細求
蒲鞭懸不試慎母姑息愛烈火望多畏不見鄭國
僑寬猛相調劑慎擊豪俗橫慎察奸民僞意見慎
拘泥耳目慎蒙蔽俗宜慎紛更岸獄慎留滯慎母
薄儒冠維風從此始慎母任得役此輩實貪戾所
難非清勤所苦多牽掣精白矢孤衷善最從計議
吾家祖父來 國恩沐屢世汝祖職諫垣歸田猶
壯歲汝伯直 綸扉暮齒愧充位平生報稱心惟
于汝乎冀慎母迂吾言黽勉作循吏

贈吳甥世其

丰神奕奕洛中英應遣吾家宅相成濟世才華慚
謝舅照人珠玉羨何甥將來定展搏風翼歸去從
舒愛日誠富貴知君原自有短牆莫棄讀書檠

雨

入秋風雨幕連朝門巷低窪水不銷喜我從無騎
馬出虛堂堅卧聽蕭蕭

三條廣路市廛稠滯洩全憑兩道溝祇有潘家河
久塞拖泥帶水不勝愁

送翟立齋侍御出守楚雄

文翁化自成鄒魯龔遂民知愛犢牛懷古每尋循

吏傳送君親佩左符遊霜清燕市開三院雨過滇
池擁八騶敢戀承明輕郡邑 主恩一體念難酬
碧雞金馬笑何求持節掄材記勝遊立齋曾典門
滇南鄉試門
下士迎新大尹道旁民識舊瀛洲行循搢紳環山
郭卧看盤龍入郡樓荒徼祇宜安靜吏撫綏須貸
至尊憂

都門祖帳漫離憂出守親宣入告猷竹馬待迎戔
碌驛萊衣先舞踏歌樓狄公心自瞻雲切黃相名
從治郡優但得諸君能濟物年年送客任人羞時同

署張小令同年張
孟草皆出典郡

寶山曾共讀書樓濟世安民夙講求卅載名場吾
落拓一官詞院子淹留新承寵命侯千騎祇飲
虹江水半甌珍重平生清節在循聲不遣愧朋儔
告歸

非必衡門始可棲古來大隱隱金閨祇緣老病心
情懶怕向風塵面目低羽短漫隨橫海鵠角羸須
戒觸藩羝于今安穩騎驢去豈有途傷昨日迷
升沉異路各分奔斥鴳寧知九萬鷗筮仕偶航中
隱趣歸休亦拜大君恩烟雲變滅山頭市魚麥
豐滋海上村預擬還家召鄰友便將薄俸辦開樽

安步真宜下澤轅敢將癯骨慕乘軒閉門自愛兒
孫讀得食生憎雁鷺喧拙養田園思栗里名高管
葛笑深源紆朱拖紫公朝滿若箇心曾到塞垣

蜀棧秦川未罷兵 至尊辛苦念西征空慚雄劍
鳴虛壁尙抱殘書對短檠三載官催春夢覺一心
歸赴海鷗盟盼他凱奏鯨鯢淨擊某田間頌太平
次韻陳蔭山前輩感懷四首

擊到瑤章照眼新頓消撲面庾公塵但偷騷艷能
醫俗何假雄文賦逐貧社櫟終全無用我冶金任
躍不祥人好從元亮吟歸去叱犢躬耕共此民

妻啼饑餓子號寒每笑昌黎免俗難不假侯鯖誇
旅食寧容腐鼠嚇微官遊仙樂聽鈞天所老禿花
收夢筆端却念 聖明多盛事買將邸報剪燈看
歸去江邊卧小樓 主恩慚愧未能酬長纓請抱
終軍憤諸將詩含杜甫愁西去叢山空逐虎東瞻
渤海未馴鷗山師轉餉年來數誰代 宸衷計慮
周

四載潢池竊弄兵急需龔遂治功成盡除豺虎山
中戾便勒麒麟閣上名俯仰乾坤容蟻蝨優游耕
鑿頌昇平蠅鳴蚓響聊爲爾輸與先生掣海鯨

留別董怡園同年

與君同譜復同官，忽漫分岐慘不歡。
藥省三年從橐筆，燕山千里跨歸鞍。
宦途老去羞牛後，世味嘗來笑蟻肝。
他日相思傳尺素，好隨雲雁下江干。

留別劉六彪如胡六采臣

相從問字匝三年，扛得龍文筆似椽。
二子應如翔鵠起，餘生竟作嬾蠶眠。
歌驪送客當筵酒，聽雁懷人獨夜船。
燕北江南無限意，來秋佇盼着先鞭。

沙窩門外別友

歡忘聚首時，誼篤分襟日。
握手不忍別，跨馬還魚

出秋風動薊門原野莽蕭瑟饑鳥噪林紛旅雁過
雲疾人生各有懷萍踪異膠漆子畱侍承明我去
樂衡泌

張灣舟次

行止難自必水陸隨所便朝馳薊邱馬夕登潞水
船此水接荆揚轉漕輸幽燕官民仰日給倉窖瞻
雲連我來理歸棹頽岸恣回沿地形作襟帶海色
通風煙願言告大吏司鑰其慎旃

天津

鶯花夢裏帝京春一夕秋風送旅人不學浮屠

戒三宿孤蹤五日滯天津

逝水滔滔出大都征帆夜落客心孤
五更月黑人聲寂獨聽潮生丁字沽

舟中九日

無自陟岵巖羈心愁未堪孤舟作重九
相對祗初三帆挂風從北人爭雁向南
故園有鼓菊久矣別羅含

夜雨

安得吹將雨氣空此心遙夜怨秋風
客中不待芭蕉樹卧聽蕭蕭打短篷

鼻息如雷卧榻旁羨他安穩夢江鄉憑誰與我聽
秋雨太息悲風折雁行

轉側衾裯睡未成黃昏一雨到殘更不知點滴緣
何故都作離人耳畔聲

塔灣

濁河流曲折白塔立崢嶸傍岸一帆落斜陽雙眼
明秋高遍野色邕近辨人聲回首長安遠暮雲千
里情

臨清

昔年白蓮賊此地煽編氓匝月煩
神武揮戈斬

巨鯨東來仍富庶西望劇縱橫經畧蒙恩重何時得罷兵

東昌

片席指東郡寒城朝霧開大風聊攝地高士魯連臺水接淮黃下雲橫海岳來客途暫臨眺懷古使心哀

分水龍王廟

泰山至汶上七十二靈湫併作一溪注分爲兩派流皇威懷百谷神力送千舟轉漕通南北芳祠萬古留

出寺前鋪間

會通河濬由前朝築開束水迎糧艘兩邊疊石中
置板閘高水急翻雲濤民船到此不得去閘官喝
令開前止眼盼糧艘來不來一刻不來閘不開我
昔南歸行屢阻困守蓬艙如罔圍日停月泊咸畏
途平擬息機歸敝廬苦戀明時老猶出今來復此
浮颺觸此行幸叨神賜厚糧豐早出黃河口波面
惟憑鳬雁飛開門無復豺虎守清源水驛至寺前
滔滔不舍成逝川六日歷行閘三十快如鞢脫秋
鷹驚所苦風來打頭逆不送歸舟揚片席龍神吹

噫豈無力吁嗟乎人生得意畱有餘挾私而禱曷其極

南陽

兩湖旁稽天一河中轉漕築土爲長堤畫界各分
導居民水爲鄉矮屋踞其輿聚處襍雞犬出入踐
泥淖頽恐魚頭灾各繫門前棹前年曹汎決泛溢
南陽到田廬不復存牛馬寧辨貌至今役工民尙
未畢堤埽我行涉波瀾望洋自嗟悼夜深風雨來
伏枕驚夢覺

夜阻西灣

風沙漲碧灣連舳阻灣間帆影帷高岸燈光徹市
闌水難通十字西灣去十字三里家尙隔千山抱悶惟堅
卧深宵夢未開

出彭口間過郗山作

地近江鄉望眼深孤舟久繫晝陰陰忽聞彭口轟
流水便見郗山聳遠林細雨惱人穿敝牖長風送
客趨歸心自來行路難如許纔得揚帆喜不禁

舟夜

哀鴻天外聲顧兔枕邊明十月嚴寒夜孤舟旅客
情京華勞遠夢井里數歸程卧聽滔滔逝漂萍老

此生

宿遷

水驛苦淹留，還停下相舟。
日斜寒樹色，風勁壅河流。
井邑鄰豐沛，英雄弔項劉。
蕭條徐泗地，誰與共行遊。

阻雨

顛風驟雨阻歸期，一日愁連十二時。
壓岸濃雲寒作雪，穿牀罅漏溼侵肌。
褐衣卒歲幽人賦，廣廈如山杜老詩。
料得此時茅屋底，幾家受凍苦嗟咨。

大風

誰司冬令以風鳴遙夜洪爐鼓鞴聲況此無山平
野闊不堪高浪大河橫踏波雲湧鼉鼉起捲地沙
騰雁鷺征側耳驚心眠未穩起看殘月向東生

渡河

我渡此河吁可數三十年來廿餘度每遊必悔悔
復遊昔時青鬃今衰素人生鼎鼎能幾何光陰強
半虛奔波少年意氣喜豪縱老至事業悲蹉跎欲
涉雲濤問河伯一日往來凡幾客都見生前東去
裝有時死後理歸舶昔賢高見少宦情抽簪解組
寧躬耕旁人妄意測君子誓墓翻疑鳴不平我敢

向人誇知止自顧頭顱祇如此南歸永願守田廬
若復渡河如白水

天妃閣

洪澤湖水吞黃河併注閣口生跳波石高板束懸
湍怒輕舟陡落如飛梭呂梁蜀峽應同險嗟嗟一
日千帆過

淮安

寒風落衰柳長淮增夕波淮水去不息客心悲若
何南歸限大江北去亘洪河鄉國兩牽望層雲互
遮羅夜色迷曲渚皎月升前坡遊鱗逼岸行棲禽

掠舟過萬類各爲族獨影行自哦誰家笛聲起側
耳離恨多

雙社湖

向晚停舟雙社湖湖中月黑少明珠科名詎乏孫
莘老也有光臨草木無

召伯埭

眼穿望不到揚州水宿風餐屢滯留今夜月明懷
謝傅一行霜雁下邗溝

揚州

此地聚離賈炎海擅厚貲遂令五方民輻湊來趨

時金多逞奢麗意巧爭新奇連雲起亭臺選地闢
園池豈知昔時人早作邱壟悲江都夢空好魂魄
惓何知城邊有古樹日暮生寒颼

過京口

水驛通州到潤州烟波五十日乘舟未教塵污本
來面尙可盟尋江上鷗雲淨鍾陵撐石骨霜清爪
步落潮頭眼看故國山川在差解三年作客愁

遊西梁山

長江九派流淥淥梁山突出當其衝帝遣巨靈劈
翠峽天門兩扇分西東西梁山接青螺巒立東梁竊

青巖詩鈔卷十二

宛川黛濃兩山爭勝不相讓攬結元氣無終窮我
昔遠遊泛孤艇屢從江岸攀龍從褐山牛渚暨浮
玉搜奇處處歸詩筒祇有此山未停泊涉江恨失
雙芙蓉山靈知我老歸去杜門不出如潛蛰欲將
靈蹟邀遊賞打頭萬里生狂風長年心怯結重纜
客子興發攜枯筇未能一日收二美且循西麓觀
東峯危崖怪石苦奔峭虛亭小閣嵌玲瓏仰攀雲
烟陟絕頂俯臨洲渚窮蛟宮大峴小峴羅足底姑
浦利浦蟠胸中前朝據此爲設險于今伏莽無遺
戎武高弔古興何極東梁已映斜陽紅

灘行

太白騎鯨遊獨愛涇川水水破萬山來建瓴流自
駛我舟沂灘行雷鳴聒人耳紆迴峭石間攀躋亂
雲裏有灘名釣魚何曾見魚婢豈似大河渾舉網
得魴鯉

爲凌次仲二兄題校禮圖後限用韓公薦士
詩韻

儀禮苦難讀聲牙甚盤詰章句未分明心眼誰周
到卓哉凌先生夙擅經庫號學契姬孔傳師承鄭
賈縝羣言既博綜七戒厲高操

七戒君所自作肯
以明學禮之旨肯

青巖詩鈔卷十二

求詞賦工空使精能耗稽古得所宗循例闢其奧
羣儒作者多江杭盛名噪標目偶然同立意恐傷
盜諦觀二公書彼此各殊躡前賢缺可補後來興
豈暴遂爲八類區如奠九州興釋器辨尊解論樂
析陔駮名象各疏通性情實永好憶從宋荆公有
力如寒冱棄經獨任傳學海反收潦周官借理財
春秋等朝報門下幾農師靡然甘媚寵頒經義務
新說字目逾耗誰破人心迷空益仕途躁晦翁作
通解其時年已耄及門通續成繪圖非敢冒遺書
誰博觀俗流徒長傲先生喟焉興種學期深造力

探制作心昭如日星熏誓秉陵陽鐸益發儒林棹
多士仰斗山名公締紵縞嗟予老無成久不聞忠
告長繩慙汲井短髮羞吹帽聞誨辱殷勤廢學生
戀嫪亦欲躋其轍所苦羹惟菘君大如晉楚我陋
比部未可附敦盤焉得側圭瑁 皇朝崇實學
古師樹牙蘆謂朱石進賢 國華徵車功心傳
不知人子懷獨戀慈烏抱且潔蘭陔羞徐轉迷海
漚虎親時正長鱣堂志無懊況此十七篇何殊十
二稿桐陰怪石間應爲經神勞

贈胡受益

願爲良相待何時悔不靈樞手自持老病惟宜親
藥裹江城何處訪衙推先生有道兼多藝妙手能
文更善醫若果存心思濟物杏林勝是讀書兒
毒草千般孰品嘗莫輕小道託岐黃醫師現有姬
公禮俗士誰通扁鵲方事有十全纔謂上肱非三
折未知良年來屢抱沉痾困乞與神丹駐景光

雙節行爲姪女歸汪氏者及媳翟氏作

秋風折黃鵠失侶何哀呼兩鵠互相依如吾姪女
媳與姑姑有膝下兒襁褓成貌孤不敢以身殉吞
聲含淚勤哺雛幼聘翟氏女舊戚聯葭葦婚嫁有

期兒忽折不可奈何命也夫姑曰汝改適何爲
此青春姝媳曰吾從一何忍別繫紅羅襦姑憐其
媳媳憐姑兩人忍死同飢飭長夜一青燈空房兩
紡車清如飲冰苦茹荼人間有此雙節無不知天
道竟何似 聖朝彰瘡將旌閭

和沈循士詠物詩韻

桑烟

炊烟杳杳復濛濛活火爐邊鼓鞴通小院輕陰生
穀雨疎簾新爽度松風閒棲牕竹添濃翠澹瑣庭
花襯嫩紅午夢醒來呼茗椀擁書如倚白雲叢

花影

看花千匝繞苔墀
要看雙丸各午時
不覺憑空添色相
却無凝滯任推移
畫師筆妙誰工似
倩女魂歸未忍離
若使芳心能解語
應如形影咏陶詩

竹韻

一叢瀟灑恰臨流
詎待風生韻滿樓
相對何人容俗態
此間無日不清秋
音收點瑟神偏遠
趣溢陶琴指小畱
却怪聽松傳雅事
奔濤撼地遶幽幽

碁聲

坐隱空齋寂不呶
一枰相對兩棋交
心遊畏日炎

風外響度疎簾古木梢開戶客來驚剝啄當場人
靜費推敲誰從白鶴參坡句落子聲中味曲包